

二十四史九通政典類要合編

明

第五十冊

新平州

明學

PDG

二十四史九通政典類要合編卷二百六十五

明九

禮登極儀 大朝儀 常朝儀 聖節朝賀 皇太子親王朝儀 諸王來朝儀 諸司朝覲
儀 中宮受朝儀 大宴儀 上尊號徽號儀 冊皇后儀 冊妃嬪儀 冊皇太子及

皇太子妃儀 冊親王及王妃儀 冊公主儀 冊太子儀 冊皇子儀 冊皇太子及

太孫妃 品官冠禮 庶人冠禮 女笄 天子納后儀 皇太子納妃儀 親王婚禮

公主婚禮 品官婚禮 庶人婚禮 經筵 日講 巡幸 頒詔儀 迎接詔赦儀 進

書儀 進表箋儀 三老五更 鄉飲酒禮 以上嘉禮

明太祖洪武元年正月即帝位於南郊

明史禮志

先是吳元年十二月命左丞相李善長具登極儀善長率禮官奏即位日先告祀天地禮成即位於

南郊丞相率百官以下及都民耆老拜賀舞蹈呼萬歲者三具鹵簿導從詣太廟上追尊四世冊寶

告祀社稷還具袞冕御奉天殿百官上表賀遂定為登極儀

續通考王禮考

正德十六年世宗入承大統先期造行殿於宣武門外南向設帷幄御座備翼善冠服及鹵簿大駕

以候至期百官郊迎駕入行殿行四拜禮明日由大明門入省詔草改年號素服詣武宗几筵謁告

畢設香案奉天殿丹陛上皇帝袞冕行告天地禮詣奉先殿奉慈殿謁告仍詣武宗几筵慈壽皇太

后莊肅皇后前各行禮遂御華蓋殿百官朝服入傳旨免賀五拜三稽首鴻臚寺官請升殿帝由午

門出御奉天殿鳴鞭贊拜頒詔如制

明史禮志

右登極儀

明太祖洪武元年定正旦朝會儀

明史禮志

二十六年定正旦冬至朝會儀先日尚寶司設御座於奉天殿及寶案於御座東香案於丹陛南教坊司設中和韶樂於殿內東西北向翌明錦衣衛陳鹵簿儀仗於丹陛及丹墀設明扇於殿內列車輅於丹墀鳴鞭四人左右北向教坊司陳大樂於丹陛東西北向儀禮司設同文玉帛兩案於丹陛東金吾衛設護衛官於殿內及丹陛陳甲士於丹墀至午門外錦衣衛設將軍於丹陛至奉天門外陳旗幟於奉天門外俱東西列典牧所陳仗馬犀象於文武樓南東西向司晨郎報時位於內道東近北糾儀御史二位於丹墀北內贊二位於殿內外贊二位於丹墀北傳制宣表等官位於殿內俱東西向鼓初嚴百官朝服班午門外次嚴由左右掖門入詣丹墀東西北向立三嚴執事官詣華蓋殿帝具袞冕陞座鐘聲止儀禮司奏執事官行禮贊五拜畢奏請陞殿駕興中和樂作尚寶司捧寶前行導駕官前導扇開簾捲寶置於案樂止鳴鞭報時贊班齊大樂作行四拜禮樂止典儀唱進表樂作給事中二人詣同文案前導引序班舉案由東門入置殿中樂止宣目官跪宣訖展表官取表宣表官至簾前衆官皆跪宣表訖序班舉表案於殿東衆官皆跪代致詞官跪丹陛中致詞云具官臣某茲遇正旦三陽開泰萬物咸新冬至則云律應黃鐘日當長至恭惟皇帝陛下膺乾納祜奉天永昌賀畢衆官皆俯伏興樂作四拜興樂止傳制官跪奏傳制由東門出至丹陛東向立稱有制贊禮唱跪宣制云履端之慶冬至則云履長之慶與卿等同之贊禮唱俯伏興搢笏三舞蹈山呼百官拱手加額呼萬歲三出笏

俯伏興樂作四拜興樂止侍儀奏禮畢中和樂作鳴鞭駕興尚寶官捧寶導駕官前導至華蓋殿樂止百官以次出

續通典
禮典

右大朝儀

洪武三年定制朔望日帝皮弁服御奉天殿百官朝服於丹墀東西再拜班首詣前同百官鞠躬稱

聖躬萬福復位皆再拜分班對立省府臺部官有奏由西階陞殿奏畢降階百官出

明史
禮志

凡早朝文官自左掖門入武官自右掖門入如華蓋殿朝至鹿頂外東西序立鳴鞭訖守衛官至鹿頂內行禮訖就侍立位各衙門官以次行禮訖有事奏者入奏事無事奏者四品以上及應升殿者入殿內侍立五品以下官出至鹿頂外列班北向立候鳴鞭以次出如奉天殿朝俱於華蓋殿行禮奏事畢五品以下官詣丹墀依品級列班重行北向立四品以上及翰林院官給事中監察御史等官於中左右門伺候鳴鞭各詣殿內立候朝退捲班以次出如先於奉天殿朝後卻奏事者又武官於丹墀內依品級重行北向立候鳴鞭行禮訖四品以上及翰林院官給事中監察御史等官陞殿侍立五品以下仍前序立候謝恩見辭人員行禮訖鳴鞭捲班退有事奏者於奉天門或華蓋殿進奏無事奏者以次出

續通典
禮典

穆宗隆慶元年都給事辛自修等以朝儀久曠班行不肅請令禮官考議成式禮部禮科會議國初定制百官以品序立其後更定又有不拘於品者如內閣官錦衣衛升立寶位之東西翰林學士列

於僉都御史之上其他翰林官不論品級敘於京堂之內科道官自爲一等列於部屬之先及鴻臚寺尚寶司列於西階三科六道與東班對待雖若次序參錯然或以顧問糾察或以奉事承旨莫不有因難以輕改今後常朝悉如此例其餘官員仍依品級崇卑衙門次序爲例如有紊越聽糾儀官糾奏從之神宗萬曆二年令常朝日記注起居官四人列於東班給事中上稍前以便觀聽午朝則列於御座西稍南

續通典
禮典

右常朝儀

明太祖洪武元年定朝賀儀凡冬至至聖節朝會宴享皆同其聖節致詞皇太子則云茲遇父皇陛下聖誕之辰謹率諸弟某某等敬祝萬萬歲壽丞相則云茲遇皇帝陛下聖誕之辰謹率文武百僚敬祝萬萬歲壽不傳制

續通典
禮典

英宗天順五年十一月丁未以冬至至萬壽節同日改致詞宣表等儀禮部言一節慶賀致詞各異又冬至傳制聖節不傳制今請通制詞曰茲遇律應黃鍾日當長至恭惟皇帝陛下萬壽聖節膺乾納祐奉天永昌臣某等誠歡誠抃敬祝萬萬歲壽然後惟以冬至制詞傳答羣臣其各王府及在外文武衙門二節賀表若前後宣讀不無重複請通宣表目又通宣表文曰忻逢長至恭遇聖誕其在外文武衙門至日行告天祝壽禮宜曰今茲冬至至恭遇聖誕聖壽益增從之

續通典
禮典

右聖節朝賀

洪武元年九月定制凡正旦等大朝皇帝御奉天殿先設皇太子親王次於文樓設拜位并拜褥於丹陛上正中皇帝升座殿前執事班起居訖引進引皇太子及親王由奉天東門入百官入樂作皇太子親王升自東階至丹陛拜位樂止贊四拜樂作興樂止引進導由東殿門入樂作內贊引至御座前位樂止唱跪皇太子跪稱賀云長子某茲遇履端之節冬至則云履長率諸弟某等欽詣父皇陛下稱賀傳制如前贊俯伏興皇太子諸王由東門出樂作引進引復丹陛位樂止贊四拜樂作興樂止降自東階樂作至文樓樂止百官隨入賀其朝皇后則於坤寧宮略如朝皇帝儀朝賀皇太后禮皆同

明史禮志

右皇太子親王朝儀

明代仿古封建親王之藩不常入朝朝則賜資甚厚初凡來朝先期陳御座於奉天殿如常儀諸王次於奉天門外東耳房鼓三嚴百官入就侍立位引禮導王具袞冕由東門入升東階就位王府從官就丹墀位贊拜樂作王與從官皆四拜興樂止王從殿東門入樂作內贊導至御前樂止王跪王府官皆跪王致辭曰第幾子某王某茲遇某時入覲欽詣父皇陛下朝拜贊俯伏興王由東門出樂作復拜位樂止贊拜四拜王興從官皆四拜興樂作駕興王及各官以次出

明史禮志

明會典曰天子與親王雖有長幼之分在朝廷必講君臣之禮蓋天子之位卽祖宗之位祖宗所執大圭於上鑲字題曰奉天法祖世世相傳凡親王來朝雖長於天子者天子執相傳之圭以受禮蓋

見此圭如見祖考也凡諸王來朝先常服見天子三叩頭不拜奉先殿祭畢不拘何殿樓閣門下天子執圭王冕服行五拜三叩頭禮次見東宮行四拜禮如尊長東宮各拜若遇大宴會於便殿筵宴敘家人禮羣臣大宴會中王並不入席又洪武初令親王每歲朝覲不得一時同至一王還國無虞信報別王方聽來朝不拘歲月自長至幼以適先至適者朝畢方及庶者亦分長幼而至周而復始毋失其序其諸王居邊者無警則依期來朝有警從便不拘朝期

續通考
王禮考

右諸王來朝儀

明制天下官三年一入朝自十二月十六日始鴻臚寺以次引見二十五日後每日方面官隨常朝官入奉天門行禮府州縣官及諸司首領官吏上官吏俱午門外行禮正旦大朝以後方面官於奉天殿前序立知府以下奉天門金水橋南序立如常朝儀

明史
禮志

天順實錄三年十二月鴻臚寺言舊制天下朝覲官至者方面官隨品級序於京官之次則侍郎副都御史等官當班於布政司之後矣然侍郎副都御史等官須當奏對班行隔越趨走不便是以以前此方面官往往前後參錯不一今後方面官請遞降京官一班序立庶朝有定著班無錯雜禮體事宜兩無妨碍從之著爲令

續通考
王禮考

右諸司朝覲儀

洪武元年九月詔定凡中宮朝賀內使監設皇太后皇后寶座於宮中丹陛儀仗內使執之殿上儀

仗女使執之陳女樂於宮門外設皇貴妃幄次於宮門外之西近北設公主幄次於宮門外之東稍南設外命婦幄次於門外之南東西向皇太后皇后服褱衣出閣仗動樂作升座樂止司賓導外命婦由東門入內道東西班侍立訖導皇貴妃眾妃由東門入至陞上拜位贊拜樂作四拜興樂止導由殿東門入樂作內贊接引至殿上拜位樂止贊跪妃皆跪皇貴妃致詞曰妾某氏等茲遇履端之節冬至則云履長泰詣稱賀致詞畢皆俯伏興樂作復位樂止贊拜樂作四拜興樂止降自東階出司賓導公主由東門入至陞上拜位以次立行禮如皇妃儀司賓導外命婦入殿前中道拜位贊拜如儀班首由西陞升入殿西門樂作內贊接引至殿上拜位班首及諸命婦皆跪班首致詞曰某國夫人妾某氏等稱賀賀畢出復位司言跪承旨由殿中門出立露臺之東南向稱有旨命婦皆跪司言宣旨曰履端之慶與夫人等共之贊興司言奏宣旨畢皇后興樂作入內閣門樂止諸命婦出太皇太后朝賀儀同

明史
禮志

右中宮受朝儀

明制有大宴中宴常宴小宴凡大饗尚寶司設座於奉天殿錦衣衛設黃麾於殿外之東西金吾衛設護衛官二十四人於殿東西教坊司設九奏樂歌於殿內設大樂於殿外立三舞雜隊於殿下光祿寺設酒亭於御座下西膳亭於御座下東珍羞醢醢亭於酒膳亭之東西設御筵於御座東西設皇太子座於御座東西向諸王以次南東西向羣臣四品以上位於殿內五品以下位於東西廡司

壺尚酒尚食各供事至期儀禮司請升座駕興大樂作升座樂止鳴鞭皇太子親王上殿文武官四品以上由東西門入立殿中五品以下立丹墀贊拜如儀光祿寺進御筵大樂作至御前樂止內官進花光祿寺開爵注酒詣御前進第一爵教坊司奏炎精之曲樂作內外官皆跪教坊司跪奏進酒飲畢樂止衆宮俯伏興贊拜如儀各就位坐序班詣羣臣散花第二爵奏皇風之曲樂作光祿寺酌酒御前序班酌羣臣酒皇帝舉酒羣臣亦舉酒樂止進湯鼓吹響節前導至殿外鼓吹止殿上樂作羣臣起立光祿寺官進湯羣臣復坐序班供羣臣湯皇帝舉節羣臣亦舉節贊饌成樂止武舞入奏平定天下舞第三爵奏睿皇明曲樂作進酒如初樂止奏撫安四夷之舞第四爵奏天道傳之曲進酒進湯如初奏車書會同之舞第五爵奏振皇綱之曲進酒如初奏百戲承應舞第六爵奏金陵之曲進酒進湯如初奏八蠻獻寶舞第七爵奏長揚之曲進酒如初奏採蓮隊子舞第八爵奏芳醴之曲進酒進湯如初奏魚躍于淵舞第九爵奏駕六龍之曲進酒如初光祿寺收御爵序班收羣臣蓋進湯進大膳大樂作羣臣起立撤膳奏百花隊舞贊撤案光祿寺撤御案序班撤羣臣案贊宴成羣臣皆出席北向立贊拜如儀羣臣分東西立儀禮司奏禮畢駕興樂止以次出其中宴禮如前但進七爵常宴如中宴但一拜三叩頭進酒或三或五而止凡宴命婦坤寧宮設儀仗女樂皇后常服升座皇妃皇太子妃王姬公主亦常服隨出閣入就位大小命婦各立於座位後丞相夫人率諸命婦舉御食案丞相夫人捧壽花二品外命婦各舉食案於皇妃皇太子妃王姬公主前大小命婦各就

座位奉御執事人分進壽花於殿內及東西廡酒七行上食五次酌酒進湯樂作止並如儀

明史禮志

右大宴儀

明制天子登極奉母后或母妃爲皇太后則上尊號其後或以慶典推崇皇太后則加二字或四字爲徽號世宗時上兩宮皇太后增至八字上徽號致詞而上尊號則進寶冊上尊號自宣宗登極尊太皇太后始先期遣官祭告天地宗社帝親告太宗皇帝大行皇帝几筵是日鳴鐘鼓百官朝服奉天門設冊寶綵輿香亭中和韶樂及大樂設而不作內官設皇太后寶座陳儀仗于宮中設冊寶案于寶座前設皇帝拜位于丹陛正中親王拜位于丹墀內女樂設而不作皇帝冕服御奉天門奉冊寶官以冊寶置輿中內侍舉輿皇帝隨輿降階陞輅百官於金水橋南北向立輿至皆跪過輿隨至思善門外橋南北向立皇帝至思善門內降輅皇太后陞座輿至丹陛皇帝由左門入至陞右北向立親王冕服各就位奏四拜皇帝及王以下皆四拜奉冊寶官以冊寶由殿中門入立於左皇帝由殿左門入至拜位跪親王百官皆跪奏摺圭奏進冊奉冊官以冊跪進皇帝受冊獻訖執事官跪受置案左奏進寶奉寶官以寶跪進皇帝受寶獻訖執事官跪受置案右奏出圭奏宣冊執事官跪宣讀皇帝俯伏興由左門出至拜位奏四拜傳唱百官同四拜禮畢駕興是日皇帝奉皇太后謁奉先殿及几筵行謁謝禮禮畢皇太后還宮服燕居冠服陞座皇帝率皇后皇妃親王公主及六尚等女官行慶賀禮翌日外命婦四品以上行進表箋禮

明史禮志

右尊號徽號儀

太祖初定制凡冊皇后前期三日齋戒遣官告祭天地宗廟前一日侍儀司設冊寶案於奉天殿御座前設奉節官位於冊案之東掌節者位于其左稍進設承制官位于其南俱西向設正副使受制位於橫街之南北向設承制宣制官位于其北設奉節奉冊寶官位於其東北俱西向設正副使受冊寶褥位于受制位之北北向典儀二人位丹陛上南贊禮二人位正副使北知班二人位贊禮之南俱東西相向百官及侍從位如朝儀是日早列鹵簿陳甲士設樂如儀內官設皇后受冊位及冊節寶案于宮中設香案於殿上設權置冊寶案於香案前設女樂於丹陛質明正副使及百官入鼓三嚴皇帝袞冕御奉天殿禮部官奉冊寶各置於案諸執事官各入就殿上位立樂作四拜興樂止承制官奏發皇后冊寶承制訖由中門出降自中陛至宣制位曰有制正副使跪承制官宣制曰冊妃某氏爲皇后命卿等持節展禮宣畢由殿西門入正副使俛伏興執事者舉寶冊案由中門出降自中陛奉節官率掌節者前導至正副使褥位以案置于北掌節者脫節衣以節授奉節官奉節官以授正使正使以授掌節者掌節者跪受興立於正使之左奉節官退引禮引正使詣受冊位奉冊官以冊授正使正使跪受置於案退復位副使受寶亦如之樂作正副使四拜興樂止正使隨冊副使隨寶掌節者前導舉案者次之樂作出奉天門樂止侍儀奏禮畢駕興百官出掌節者加節衣奉冊寶官皆擗笏取冊寶置龍亭內儀仗大樂前導至中宮門外樂作皇后具九龍四鳳冠服褱衣

出閣至殿上南向立樂止正副使奉冊寶權置於門外所設案上引禮引正副使及內使監令俱就位正使詣內使監令前稱冊禮使臣某副使臣某奉制授皇后冊寶內使監令入告皇后出復位引禮引內外命婦入就位正使奉冊授內使監令內使監令跪受以授內官副使授寶亦如之各復位內使監令率奉冊奉寶內官入各置於案尚儀引皇后降陛詣庭中位立內官奉冊寶立於皇后之東西內使監令稱有制尚儀奏拜皇后拜樂作四拜興樂止宣制訖奉冊內官以冊授讀冊內官讀訖以授內使監令內使監令跪以授皇后皇后跪受以授司言奉寶如前儀受訖以授司寶尚儀奏拜皇后拜如前內使監令出詣正副使前稱皇后受冊禮畢使者退詣奉天殿橫街南北面西上立給事中立於正副使東北西向正副使再拜復命曰奉制冊命皇后禮畢又再拜給事中奏聞乃退皇后既受冊寶升座引禮引內命婦班首一人詣殿中賀位跪致詞曰茲遇皇后殿下膺受冊寶正位中宮妾等不勝懽慶謹奉賀贊拜樂作再拜興樂止退復位又引外命婦班首一人入就殿上賀位如內命婦儀禮畢俱出皇后降座樂作還閣樂止次日百官上表箋稱賀皇帝御座受賀如常儀遂卜日行謁廟禮先遣官用牲牢行事告以皇后將祇見之意前期皇后齋三日內外命婦及執事內官齋一日設皇后拜位於廟門外及廟中設內命婦陪祀位於廟庭南外命婦陪祀位於內命婦之南司贊位皇后拜位東西司賓位內命婦之北司香位香案右陳盥洗於階東司盥洗官位其所至日內外命婦各翟衣集中宮內門外皇后具九龍四鳳冠服褱衣出內宮門升輿至外門外降輿

升重翟車鼓吹設而不作尚儀陳儀衛次外命婦次內命婦皆乘車前導內使監扈從宿衛陳兵仗前後導從皇后至廟門司賓引命婦先入皇后降車司贊導自左門入就位北向立命婦各就位北向立司贊奏拜司賓贊拜皇后及命婦皆再拜興司贊請詣盥洗位盥手悅手由東陞升至神位前司贊奏上香者三司香捧香於右皇后三上訖導復位贊拜如前司贊奏禮畢皇后出自廟之左門命婦以次出皇后升車命婦前導如來儀過廟鼓吹振作皇后入宮是日皇帝宴羣臣於謹身殿皇后宴內外命婦於中宮皆如正旦宴會儀

明史禮志

太祖洪武三年冊孫氏爲貴妃定儀皇帝不御殿承制官宣制曰妃某氏特封某妃命卿等持節行禮但授冊無寶餘並如中宮儀

續通志禮志

右冊皇后儀 冊妃嬪儀

明興定制冊皇太子所司陳設如冊后儀設皇太子拜位於丹陛上中嚴皇帝袞冕御謹身殿皇太子冕服俟于奉天門外辦皇帝御奉天殿引禮導皇太子入奉天東門樂作由東階升至丹陛位樂止百官各就丹陛位樂作皇太子再拜興樂止承制官由殿中門出立于門外曰有制皇太子跪宣制曰冊長子某爲皇太子皇太子俯伏興樂作再拜樂止引禮導皇太子由殿東門入樂作內贊導至御座前樂止內贊贊跪贊宣冊宣畢贊搢圭贊授冊皇太子搢圭跪受冊以授內侍復贊授寶如授冊儀贊出圭皇太子出圭俯伏興由殿東門出執事官舉節冊寶隨出皇太子復位樂作四拜興

樂止由東階降樂作至奉天門樂止儀仗鼓樂迎冊寶至文華殿持節官持節復命禮部官奉詔書
赴午門開讀百官迎詔至中書省頒行侍儀奏禮畢駕興還宮皇太子詣內殿俟皇后升座行朝謝
禮四拜恭謝曰小子某茲受冊命謹詣母后殿下恭謝復四拜禮畢親王世子郡王俟于文華殿丹
陛上皇太子升座親王以下由東陞升就拜位四拜長王恭賀曰小弟某茲遇長兄皇太子榮膺冊
寶不勝欣忭之至謹率諸弟詣殿下稱賀賀畢皆四拜皇太子興以次出諸王詣中宮四拜長王致
詞賀畢皆四拜出是日皇太子詣武英殿見諸叔行家人禮四拜諸叔西向坐受見諸兄行家人禮
二拜諸兄西向立受次日百官進表箋慶賀內外命婦慶賀中宮如常儀乃擇日太子謁太廟其皇
太子妃受冊與皇太子同日傳制節冊將至內殿妃降自東階迎置于案贊就拜位贊跪妃跪贊宣
冊女官跪取冊立宣畢贊授冊贊摺圭女官以冊授妃妃摺圭受冊訖以授女官女官跪受捧立贊
出圭與四拜禮畢內官持節出妃送至殿外正副使持節復命是日妃具禮服詣奉先殿行謁告禮
隨詣宮門俟皇帝皇后升座入謝恩行八拜禮又詣各宮皇妃前行四拜禮還宮詣皇太子前亦四
拜禮畢升座王妃公主郡主及外命婦於丹墀拜賀如儀

明史
禮志

右冊皇太子及皇太子妃儀

洪武三年定制冊命親王先期告宗廟所司陳設如冊東宮儀至期皇帝御奉天殿皇太子親王由
奉天東門入樂作陞自東陞皇太子由殿東門入內贊導至御前侍立位親王入至丹陛拜位樂止

贊拜樂作再拜興樂止承制官承制如儀諸王皆跪宣制曰封皇子某爲某王某爲某王宣畢諸王俯伏興贊拜樂作再拜興樂止引禮導王由殿東門入樂作內贊引至御座前拜位樂止王跪贊授冊捧冊官以冊授讀冊官讀訖授丞相丞相授王王搢圭受授內使授寶如上儀訖王出圭俯伏興引禮導王出復位以次引諸王入殿授冊寶如儀內使以冊寶置綵亭訖贊拜樂作諸王皆四拜興樂止內使舉亭前行親王由東階降樂作出奉天東門樂止禮部尚書請詔書用寶赴午門開讀禮畢皇帝還宮皇太子出王年幼則遣官齎冊寶授之丞相承制至王所東北立西南向宣制最幼者行保抱之禮是日親王朝謝皇后太子與東宮受冊朝謝同親王各自行賀幼者諸長者行四拜禮百官詣親王賀亦行四拜禮丞相至殿上跪文武官于庭中丞相致詞曰某官某等茲遇親王殿下榮膺冊寶封建禮成無任欣忭之至賀畢丞相及百官復四拜次日皇太子冕服於奉天殿朝賀皇帝太子致詞曰長子某茲遇諸弟某受封建國謹詣父皇陛下稱賀賀中宮致詞曰謹詣母后殿下稱賀百官進表箋賀皇帝及中宮東宮如東宮受冊儀內外命婦賀中宮致詞曰妾某氏等茲遇親王受封建國恭詣皇后殿下稱賀是日百官及命婦賜宴擇日諸王謁太廟時秦晉燕趙吳五王皆長而齊譚趙魯四王方幼故兼具其制

明史
禮志

洪武九年七月命使冊公主設冊案於乾清宮御座之東南冊用銀字鍍金皇帝皇后升御座遣使捧冊傳制如儀使者至華蓋殿公主拜受其儀略與冊太子妃同凡皇姑曰太長公主皇姊妹曰長

公主皇女曰公主親王女曰郡主郡王女曰縣主孫女曰郡君曾孫女曰縣君元孫女曰鄉君郡主
以下受詰封不冊命

明史
禮志

右冊親王及王妃儀 冊公主儀

明太祖洪武三年定制先期太史院卜日工部製冕服翰林撰祝文祝辭禮部具儀注中書省承制
命某官攝太師某官攝太尉既卜日遣官告天地宗廟行一獻禮前一日內使監令陳御冠席於奉
天殿正中其南設冕服案及香案寶案侍儀司設太師太尉起居位於文樓南西向設拜位於丹墀
內道設侍立位於殿上御席西東向設盥洗位於丹陛西其百官及諸執事位次如大朝儀是日質
明鼓三嚴百官入皇帝服空頂幘雙童髻雙玉導絳紗袍御輿以出侍衛警蹕奏樂如常儀皇帝升
座鳴鞭報時訖通班贊各供事太師太尉先入就拜位百官皆入贊拜樂作四拜興樂止引禮導太
師先詣盥洗位搢笏盥訖訖出笏由西陛升內贊接引至御席西東向立引禮復導太尉詣盥洗位
盥訖訖入立於太師南侍儀奏請加立服太尉詣皇帝前少右跪搢笏脫空頂幘以授內使內使跪
受幘興置於箱太尉進櫛設纚畢出笏興退立於西太師詣御前北向立內使監令取冕立於左太
師祝曰令月吉日始加立服壽考維祺以介景福內使監令捧冕跪授太師太師搢笏跪受冕加冠
加簪纓訖出笏興退立於西御用監令跪奏請皇帝著衮服皇帝興著衮服訖侍儀奏請就御座內
贊贊進醴樂作太師諸御前北向立光祿卿奉酒進授太師太師搢笏受酒祝曰甘醴惟厚嘉薦令

芳承天之休壽考不忘祝訖跪授內使內使跪受酒捧進御前皇帝受祭少許啐酒訖以虛盞授內使樂止內使受盞降授太師太師受盞興以授光祿卿光祿卿受盞退太師出笏退復位內贊導太師太尉出殿西門樂作降自西階引禮導至丹墀拜位樂止贊拜樂作太師太尉及文武官皆四拜興樂止搢笏三舞蹈山呼出笏俯伏興樂作復四拜樂止侍儀奏禮畢皇帝興鳴鞭樂作入宮樂止百官出皇帝改服通天冠絳紗袍拜謁太后如正旦儀擇日謁太廟與時祭同明日百官公服稱賀賜宴謹身殿

明史
禮志

右天子加元服

皇太子冠禮其儀洪武元年定前期太史監卜日工部製袞冕遠遊冠折上巾服翰林院撰祝文祝辭禮部具儀注中書省承制命某官爲賓某官贊既卜日遣官祭告天地宗廟前一日內使監令陳御座香案於奉天殿設皇太子次於殿東房賓贊次於午門外質明執事官設盥洗於東階設皇太子冠席於殿上東南南向設醴席於西階上南向張帷幄於東序內設褥席於帷中又張帷於序外御用監陳服於帷內東領北上袞服九章遠遊冠絳紗袍折上巾緇纒犀簪在服南櫛又在南司尊實醴於側尊加勺羃設於醴席之南設玷於尊東置二爵進饌者實饌設於尊北諸執事者各立其所鼓三嚴文武官入皇帝服通天冠絳紗袍升座如常儀賓贊就位樂作四拜興樂止侍儀司跪承制降自東階詣賓前稱有敕賓贊及在位官皆跪宣制曰皇太子冠命卿等行禮皆俯伏興四拜文